

Lu trenu

E' 'n-trenu ca camina notti e ghiornu
la Vita: un vecchiu trenu,
ca curri sempri, senza cuincidenzi,
guidatu di 'n-fuchista furmidabili
chiusu nta la cabina di cumannu,
ca nuddu ha vistu mai e nuddu viri.
Ad ogni stazioni, comu ferma,
c'è cu' acchiana di cursa, smaniúsu
di scupriri li gioi ca l'aspettanu
duranti lu billissimu viaggiu.
E c'è puru cu' scinni, strascinànnusi
valigi e sacchi chini
di ricordi di cosi belli e brutti
arricugghiùti in tuttu lu so curriri.
Lu trenu frisca. E sùbbitu riparti
ccu ddu so eternu càrricu
di genti d'ogni cetu e d'ogni età,
ca cancia sempri a tutti li firmati
e pari, invece, sempri chidda stissa
ca c'era prima e n'ha scinnutu ancora.